

COMUNICATO n. 96 del 20/01/2025

Di vitzevorsitzaren Francesca Gerosa hatt gezoaget in setz vo Dante Platz bazta bart khemmen getànt

ARGE ALP 2025 Pinn trèff von “Vorsitzarung Trio” hefta à ’z djar vodar trentinar vüarom

[Cimbroy] ’Z hatta àgeheft ’z djar vodar vorsitzarung vodar autonome Provìntz vo Tria vo Arge Alp. ’Z iztase gehaltet, defatte, an fintzta atz 16 von hoachnach in setz vo Dante Platz dar earst istituzionàl trèff von “Vorsitzarung Trio”: di vitzevorsitzaren Francesca Gerosa hatt bokhennt di vortretar von redjongen boda hãm di vitzevorsitzarung vo Arge Alp, Tessin Kantòu un Land Vorarlberg, ’z zil iz daz sèll zo vorstiana pittnãdar bele tème soìn bichtegar un darzuar zoang in progrãm von arbatn boma bill vürtrang in ditza djar durchgevüart von trentinar.

In trèff hãmda genump toal, zbisnen in àndarn, dar kantzler von Tessin Kantòu Arnoldo Coduri, dar vorsitar von Land Vorarlberg Markus Wallner un in video dar vüarar von sekretariàt vo Arge Alp Simon Lochmann. Vor di Provìntz soinda o gest di diridjènten von Dipartimènt vor di istituzionàln sachandarn antikoruptziong un durchsichteghait Valeria Placidi un di diridjènten von Dienst vor di Zungmindarhaitn un auzantn relatziongen Elisabetta Sovilla.

Di Gerosa hatt gegrüazt un khött vorgèllzGott in Tessin kantòu vor di arbat gemacht vor Arge Alp in djar bosa hãm gehatt se di vorsitzarung un hatt untarstricht in groaz onór zo maga gian vür pittar arbat gemacht legante vorànavür allz in alpinar schatz boda gehöart alln. “Azpe autonome Provìntz vo Tria habar geböllt gem vèrt in djungen boda zornìrn in pèrge zo leba, z’arbata un zo machanen a famildja in armonia pittar natùr – asó hatta khött di Gerosa – dar ünsar progrãm sichart zo giana vür pitt alln in arbatn un pinn prodjèkte bodada sa soìn gianante nã in bege von sèlln boda soìn gest vor üs.

Da autonome Provìntz vo Tria billze untarleng zo giana vürsnen pinn sèlln prodjèkte boda àgian mearar in alpinar raum azpe: nützan pezzar ’z bazzar, di beldar, schupfan zuar an alpinar kultùr vor da umbèlt, süachan zo haba hèrta mearar öffentleschen dienst, infrastruktùrn, enerdjì in vil àndarz. Zbisnen in prodjèkte vo Arge Alp boda di Provìntz sa iz drã drau z’arbata un boda bart gian vür zo tüanaz, khüde lai umman: drauschaung afte groazan vlaischvrèzzar alle pittnãdar übar di grentzan”.

In di zait vodar trentinar vorsitzarung bartmase kontzentrar daz mearaste afte pèrng azpe platz boma zornìrt zo leba un z’arbata: “Djunge un pèrge: prodjèkte zo leba, z’arbata un untarzonemma arbat. Esperientzan un haltn hert”, pitt disan politische tèma bölltma gem vèrt in prodjèkte von laüt boda zornìrn zo leba un z’arbata in di lentar vo pèrge, süachante pitt soinar arbat zo machase khearn zo leba.

Dar Prais Arge Alp 2025 o, boda bart auzkhemmen ka lãngez, bart soìn vor di djungen von pèrng, zo geba ’z bort un zo lazza seng berda lebet alle tage in dise lentar. “Bar bölln azma khear zo reda von pèrng un bele strumèntn soìn mearar nützlich zoa azta dise plétz gian vür z’soina huamesch un guat zo geba alln näüge auzseng”, asó hatta no khött di Gerosa.

Gianante vürsnen pinn sell boda iz khent auzgemacht vodar politika übar bia zo stiana nâ in bolf alle pittnândar übar di grentzan un âgenump vo Arge Alp 'z djar 2022, est izta an prodjekt zo analizara bo ditza vich lebet afte Alpm un baz ditza bill soin gemuant vor di lântbichtschaft un vor berda hatt di vichar afte pèrng, ma bart süachan zo vorstianasan hërta mearar un zo lega panândar di date boda auzkhemmen. Asó azpeda sa hatt gehatt khött di Gerosa in da 55ege Konferéntz von Schaffar von Governo atz Airolo, in di Svaitz, in vorgânnate 25 von bimmat, da autonome Provîntz vo Tria lekk vür drauzoschauga atz mearare kategorian vo vlaischvrezzar (innemante darzuar in bolf, in per un di luks o). Ditza mage vürkhemmen lai auzbetrante bazta iz khent detzidar 'z djar 2022, zoa zo maga arbatn pezzar übar mearare tème, azpe tèknike zo prevedra di schade un süachan näüge solutziongen. Ma mage âhevan pittnan bizzschaft tèknische tagung übar ditza, haltante kunt vodar esperientz boda iz khent gemacht in üsarne lentar vor bazta âgeat in per.

Di istituzionâl vortretar boda hâmp genump toal in trèff soinse alle khött dakòrdo un hâmp âgenump bazta iz khent vorgelekk von Trentino. “Bar soin drâ z’sega ke laise laise mearare djunge soin nâ zo kheara bidrûmm in di lentar von altn, ditza ankunto in beng boda soin khent auzgepezzar un di möglichkait zo arbata vo baitom o. Bar soin kontént von sell boda hatt vorgelekk dar Trentino vorz djar 2025 ombrómm in groazan gântzan geatma vürsnen pittar arbat âgeheft in di vorgânnatn djar von svaitzarn kantöü Sankt Gallen un Tessin”, asó hatta khött dar Coduri.

Bar soin dakòrdo pinn sachandar boda soin khent vorgelekk haüt un schützan starch bazta iz khent khött übar di groazan vlaischvrèzzar, ombrómm disar iz a tème boda âgeat alln in redjongen vo Arge Alp”, hatta khött dar Wallner.

Arge Alp in an arbat kamòuschaft augelekk atz 12 von bimmat von djar 1972 atz Mösern, in Tiról, pinn zil z’arbata übar tème boda âgian alln un boda innvânk schiar 26 mildjü laüt. ’Z nemmda toal in Arge Alp, ’z Taütschlânt pinn Frai Stato vodar Baviara, ’z Österrach pinn Länder Vorarlberg, Tiról un Salzburg, ’z Beleschlânt pinn zboa autonome Provîntzan vo Poatzan un Tria un pittar Redjong Lombardia, di Svaitz pinn Kantöü Graubünden, Saknt Gallen un Tessin.

Foto un pildar von Prèss Amt

Download pildar un interviste [da](#)

<https://www.youtube.com/watch?v=35znMjA4DIA&t=1s>

<https://www.youtube.com/watch?v=nQ60It06vj8&t=1s>

<https://www.youtube.com/watch?v=koCU3W86IKU>

https://www.youtube.com/watch?v=_FK62bFlvqc&t=5s

Übarsetzt von Schaltarle vor di zung von Toalkamou vodar Zimbar Hoachebene

(cdt)